

1 PEDRO

Yi Neczy Huidibi San Pedro Yajniguejx Je Judio Mibijcpidijc

1 Hich Pedro, Jesucristo ti xyajni'bicyich ngapxhuäcxibich yi' y'ayuc. Jada neczy nyajniguejxyp miich Israel jäy huidibi adzinaayb xim yam jim Ponto naaxjot, jim Galacia naaxjot, jim Capadocia naaxjot, jim Asia naaxjot etz jim Bitinia naaxjot. ²Miich ajcxy migügtijc Dios Teedy ti xyhuin'ijxcixy, jayijp Dios ti nejhuüy co xyjäy'ada'ñyii ajcxy. Dios ti yajtigiyäy yi' yjihui'ñ ymic'ajt ma miich ajcxy mjot mhuinma'ñ, huen oyjot oyhuinma'ñ mayatunipy ajcxy jadu'n nej Dios huinma'ñ xymooygixy. Dios miich ajcxy ti xyhuin'ixy jigix mgapxymidohuipy Jesucristo, je huidib ñi'py teem cuj miid miich ajcxy ycixpi. Pidaaccix mhuinma'ñ co mgapxymidohuaangixy Dios jadu'n nej jecy'ajty je Israel jäy ytuñ, je taab anajty Moisés yaj'ögy iyujc etz yajnixidicxy ajcxy nidüg nidüg je ni'py, je' anajty ajcxy ytiy'ajt'ajtipy co capxymidohuaangixy Dios. Huen Dios may'ajt oy'ajt mijcajee tunipy ma miich ajcxy, chi jotcujc mdzináaygixipy.

Jijp'ijxcix jugy'ajtin huinixiibi

³Yi Dios, iich ajt nHuindzin Jesucristo yTeedy, huen

capxpaady y'ity, miid co may'ajt oy'ajt ti tuñ miid iich ajt co ti oyduñ huinjemybi iich ajt njot nhuinma'ñ, jëbi n'ijtim Dios yjäy. Jadachambi ooy njijp'ijxim je jugy'ajtin huinixiibi, miid co Jesús yjugypijcy huinjemy ma anajty ti y'ögy. ⁴Nañ ooy njijp'ijxim tijaty Dios xymöhuaanim jiiby tzajpjoty, huidibi ca' yhuindigoy, huidibi ca' yjibicäy, etz huidibi ca' ycixy ytigoy. ⁵Dios xycuend'adip ajcxy miid yi' ymic'ajt, ixti jiini co anajty ajcxy je m'alma nidzoocin padaangixy, co anajty je naaxhuin ycixy ytigoy. Mbadaangixy m'alma nidzoocin miid co ti mmijpidaaccixy Dios ytiy'ajt.

⁶Paady miich ajcxy ooy jotcujc'ajtcixp. Oy cham tzaachypï m'ocminajxcixy m'ocyajnajxcixy miid co jäy tzach'ijxmadza'ñ miich ajcxy mjot mhuinma'ñ. Nigi ooy jotcujc nayjihuiyigixy co ajcxy yi m'alma nidzoocin pada'ñ. ⁷Dios y'ixamyb ñejhuihuamyb pen janch miich ajcxy cixyot huinijot mmijpidaaccixy yi' y'ayuc. Paady miich ajcxy ayo'n tzaachypï mminajxcixy myajnajxcixy jëbi nigi

myajhuaatzcixy mjet mhuinma'n, tim jadu'n nej jäy yajhuaatzcixy yi oori miid jiin. Dios nigi tzocy miich ajcxy huidib yi' ytiy'ajt mijpidaaccip, ca'ydí oori. Pen tudägy miich ajcxy mhuinma'n, pen ca' mhuinma'nytigajtcixy co tzaachypi mminajxcixy myajnajxcixy, chi capxpaady ajcxy m'idipy etz mbaadipy ajcxy jotcujc'ajtin co anajty Jesús ñayguëxigyi jadügtecy ya naaxhuiñybi.

⁸Oy miich ajcxy ca' ti m'ijxcixy Jesucristo, per myajmij'ajtpy ajcxy, e cham oy ca' m'ijxcixy Jesucristo, myajmij'ajtpy ajcxy yi' ytiy'ajt. Co ajcxy mmijpidaaci Jesucristo ytiy'ajt, chi ajcxy ooy mnayjihuiyii nigi jotcujc anaxy. Je jotcujc'ajtin huidib mmiid Dios je' yejcp. ⁹Paady ycixpi ti mmijpidaaccixy Jesucristo co ajcxy m'alma xyajnidzögaani.

¹⁰Jadu'n nej Jesucristo xyajnidzögaani miich ajcxy m'alma je Dios y'ayuc najtzcapxiybi ooy anajty jecy'ajty janejhuihuaangixy nej Dios y'ayuc ñigüeje, e ca' ajcxy huinjihuiy, je huin'it tiempo anajty ajcxy capxhuäcxp Dios y'ayuc jadu'n nej Dios may'ajt tuna'n miid miich ajcxy ycixpi. ¹¹Je Dios y'ayucnajtzcapxiybi jecy'ajty ooy ajcxy jahuinmay, ooy ajcxy jahuinjihuihuañ nej yhuimbizimye je ayuc huidibi ajcxy ymiid jotjoty huinma'nyjoty, je ayuc huidibi Jesucristo yajmiguejx yi' yjihui'n ymic'ajt, je Espíritu Santo, jadu'n nej ajcxy najtzcapxiy co je Cristo tzaachypi minaxa'n yajnaxa'n, etz co ñicxa'n jadüg'oc tzajpjoty. ¹²Dios yajnejhuiy yi' y'ayucnajtzcapxiybi

co je' huidib ajcxy ycapxhuäcx jiini je' ytuna'ñyii yjada'ñyii, ca' ajcxy ixa'n. Migügtijc ajcxy, Dios ti yajtuunyii ti yajjadyii ma miich ajcxy je mxii mdiempo nej anajty je' y'ayucnajtzcapxiybi najtzcapxiy jecy'ajty je tiy'ajt. E jadachambi jadu'n nej Dios ti yajtuñyii ti yajjadyii ti jäy capxhuäcxty ma iich ajt nidüg'óciy. Je jäy huidibi capxhuäcx je tiy'ajt ymiid anajty ajcxy je Dios yjihui'n ymic'ajt huidibi Dios anajty yajnigüeje, choon tzajpjoty. Ixti je ángeles huidibi ajcxy tzajpjoty tzinaayb yjanejhuihua'n nañ jadu'n nej Dios ti yajtuñyii ti yajjadyii ma miich ajcxy, e ni ca' ajcxy nejhuiy.

Chojcpy Dios co tudägy ndzinaayim

¹³Paady ycixp ni'ixi pidaaccix mjet mhuinma'n. Huiy ycuje ajcxy mdzinähuip. Jijp'ijxcix je may'ajtin oy'ajtin huidibi Dios tunamyb miid miich ajcxy ycixpi co anajty Jesucristo yhuimbity ya naaxhuiñ. ¹⁴Capxymidoogix Dios jadu'n nej pi'c'anäg capxymidoogix ytaj yteedy. Ca' huaad m'octundigóoygixni jadu'n nej anajty mdundigóoygix co anajty ca'ni mnejhuiygix Dios ytiy'ajt. ¹⁵Oyjot oyhuinma'n ajcxy myajtunipy jadu'n nej Dios oyjot oyhuinma'n yajtuñ, je huidibi ti xyhuin'ixy ajcxy. ¹⁶Com jadu'n ymiin jaybety ma Dios ñecy, jadu'n Dios migapxy je' yjäy: "Mi'idip ajcxy oyjot oyhuinma'n jadu'n nej iich nmi'ityich oyjot oyhuinma'n."

¹⁷Miich ajcxy m'ojadajtpy je Dios Teedy. Dios ca'p tzaachytuna'n yi jäy ajcxy huin'ixpety. Hue' je'

chaachytunipy ajcxy nidüg nidüg jadu'n nej ajcxy yhuinma'nñymiidity, pen jibic-huinma'nñ ymiid, chi tzaachytunipy nigí. Paady ycixp tiydudägy ajcxy mdzinähuipy. Tzigiigix Dios. ¹⁸Je Dios canan hue' ti xyajpocyññhuaatzim co ti cojuy iich ajt nbocy miid oori o plata, jadu'n nej anajty nbocytuunim co nmijpidaacim n'ap ndeedy y'ayuc ytiy'ajt huidibi ca' ytiy'ajtiny. ¹⁹Hue' janchtiy Dios ti xyajpocyññhuaatzim miid Cristo co y'o'cy cruudzcixy, e chi ñi'py teemy vojcy miid iich ajt nbocy ycixpi. Jadu'n nej anajty Israel jäy ñayajpocyññhuaatzigixy co yaj'ögy tüg boregi ung, huidibi ca' anajty ti jibicpi miidity, e chi ñi'py teemi cuji. ²⁰Jadu'n nej Cristo y'o'cy miid iich ajt nbocy ycixpi, Dios jayijpni jadu'n yajnihuinmayiyy co jadu'n tuna'n, ca'ni anajty naaxhuiñybi chondägy. Jecy'ajty ca'ni anajty pin nejhuiy, e jadachambi Dios ajt ti xyajnejhuiyim. ²¹Paady ycixp miich ajcxy mijpidägy Dios. Dios yajjugypijc huinjemy je Cristo co y'o'cy, e Cristo cömay ooy ypidzimy jilby tzajpjoty. Yajmij'ajtcix Dios etz jijp'ijxcix co Dios xyajnidzögaanip ajcxy m'alma.

²²Ti myajhuaatzcixy mjot mhuinma'n co ti mmijpidaaccixy Dios ytiy'ajt. Naychójcigix nayjihuñiyigix nidüg nidüg cixyjot huinijot, ca' y'ametz yjotmetzity. ²³Com ti Dios oyduñ miich ajcxy mjot mhuinma'n huinjemybi miid yi' y'ayuc ytiy'ajt, co ti mmijpidaaccixy je tiy'ajt huidibi tudägyip, je huidibi ca' ycixy ytigoy, huidibi huinixii ijtp,je tiy'ajt

huidibi jugy'ajt yejcpy. ²⁴Jadu'n ymiin jaybety ma Dios y'ayuc:

Je jäy ninicx nidigooyb yi' etz je ninicx y'oy'ajtin nidigooyb yi'. Tim jadu'n nej tüg pijy co ñidecy ytiitzni, chi je pijy jadu'ñyi yca'ni, e chi jadu'ñyi je pijy y'oy'ajtin ytigooy.

²⁵Dios y'ayuc ytiy'ajt huinixii y'lity, ca' ycixy ytigooy nimina.

Jada je ayuc je tiy'ajt huidibi Dios yjäy ycapxhuäcxyp ma miich ajcxy.

2 Paady ycixp copicy co m'ixmájtzcixipy yi jibic-huinma'n nej migüg ajcxy jibic mnigapxcixy. Ca' m'aniidáaccixipy. Ca' ajcxy mnaybidägiyy jadu'n nej jihuiy ooy m'oyjäyity, e ca' yjanchity. Ca' mmigüg ajcxy ti myajca'oy'ixipy. Ca' ajcxy m'iidigoyipy mgapxtigoyipy. ²Jadu'n nej yi ma'xungdijc tzocy chüd, nañ tim jadu'n miich ajcxy tzojccixy jot'ajtcixy Dios y'ayuc ytiy'ajt, jigix jëbi ca'pxy yi mhuinma'n m'iidipy ajcxy miid je ixpijcin huidibi Dios xymooygixp, e chi ajcxy m'alma paadipy nidzoocin. ³Nidzögip miich ajcxy m'alma, peni janch ti mmijpidaaccixy je Huindzin Jesucristo y'ayuc, etz ti mnejhuiyigixy nej Dios may'ajt oy'ajt ti tuñ miid miich ajcxy ycixpi.

Cristo je tügpajcpi jaccopicyip

⁴⁻⁵Yajmij'ajtcix yi Huindzin Jesucristo. Dios ti yhuin'ixyii jëbi yHuindzin'aty ma naaxhuiñyjäy etz ooy tzocy. Yi naaxhuiñyjäy ca' ajcxy ti tuñcuend, tim jadu'n nipaady nej tüg tzaa huidibi pojtzpidijc ninigoob ca' yajtuna'n ma yi tzaadijce ycojy. Yajmij'ajtcix miich

ajcxy je Huindzin Jesucristo. Dios yaj'oyi huamby miid miich ajcxy tügpicy jäy huidibi yi' yjäy'adaanip, huidibi ojadadaangixp Dios, huidibi Dios ytung tunaangixp. ⁶Jadu'n yjaybetyity ma Dios ylibro, Dios jadu'n ymina'n:

Jim ma Israel jäy nbidägibich tüg mij'ane'mbi huidibi ti nhuin'ixyich, huidibi ooy ndzocyich, e pinjaty je' mijpidacp ooy njäygidägibich. Je mij'ame'mbi jadu'n je' nipaady nej tüg tzaa oybi huidibi tigihuamb ma tijctaatz co tzaadijc ycojy.

⁷Miich ajcxy huidibi mijpidacp Jesús, miid miich ajcxy je mij'ame'mbi ooy je' ymijity yjanchity. Per yi' ajcxy ca' mijpidägy Jesús, je' yi' ajcxy ycuydumy nej ymina'n ma jaybetyity:

Pinjaty ca' capxymidohua'n Dios, ca' ajcxy ixaangixy je Cristo, e jadu'n ajcxy nipaady nej pojtzpidijc huidibi ca' yajtunaangixy tüg tzaa oybi co tzaadijc cojcixy. Yi Cristo yi' je' je' mij'ane'mbi huidibi ane'mdähuamb tüg'óciy.

⁸Nañ jadu'n yi' ajcxy huidibi ca' mijpidägy Jesús cuydumy nej ymina'n ma yjaybetyity:

Jadu'n je Cristo nipaady nej tüg tzaa ma jäy ajcxy ycönejpcixy etz ycidaagixy.

Je jäy ajcxy huidibi ca' mijpidägy Jesús, jadu'n nipaady nej jihuüy ycönejpcixy ma tüg tzaa co ajcxy ca' tungixy cuendi Jesús y'ayuc, paady ycixpi padaangixy tzaachypi miid ypocy ycixpi, jadu'n nej Dios ti yajcöduy.

Je huidibi Dios yjäy'adyii

⁹Miich ajcxy huidibi yajmij'ajtp Jesucristo, ca' miich ajcxy mjadu'nity nej yi' ajcxy huidibi ca'capxymidoy Dios. Dios miich ajcxy ti xyhuin'ijxcixy. Je rey Jesús je' miich ajcxy ytung mduunip. Oyjot oyhuinma'n miich ajcxy myajtumy. Dios miich ajcxy xyjäy'ajtip. Miich ajcxy je' xypaat mnidiy'ajt'adipy jadu'n nej Dios ti xyajpidzimgixy ma anajty mdundigooygixy, e ti xyajhuinjihuüygixy je' ytiy'ajt nej jëb huaad mguydungixy. Jadu'n nipaady nej jihuüy Dios ti xyajtzoongixy agootztuuyb, e ti xyajtigiüygixy ma ytiicxy yjajy. ¹⁰Co anajty ca'ni mmijpidaaccixy Jesucristo, ca' anajty Dios xytungixy cuendi. Cham co ti mmijpidaaccixy Jesucristo, Dios ti xypa'ayoogixy. Dios miich ajcxy xyjäy'ajtp cham.

Yajtungix Dios y'ayuc ma mdzinaayin

¹¹Migügtijc ajcxy huidibi ooy ndzocy njihuüyich, jada nyajnimaaygixyp, jadu'n nej tüg adzinaaybi huidibi ca' chinäy ma ycajp, huidibi nihuidijtp, ca' tüg it mdzinaaygixy, copicy co ca' mnijot'adipy ajcxy yi jibic-huinma'n, jadu'n nej je jäy ajcxy ma m'adzinaaygixy nijot'ajtcixy jibic-huinma'n. Je jibic-huinma'n ca' ñaygodigüiyigixy miid oyhuinma'n. ¹²Tiydudägy mdzinähuipy ajcxy, yajtúngix oyhuinma'n miid je jäy ajcxy ma miich ajcxy m'adzinaaygixy, je jäy ajcxy huidibi

ca' nejhuiygixy Dios ytiy'ajt. Oy ajcxy ca' xy'ixaangixy etz jibic xyñigapxcixy xyñi'ojiiygixy, miid co oyjäy'ajtin mdungixyp, chi ajcxy jäygidägipy, etz miich yi' ajcxy xycapxpátcixipy ma Dios, mina anajty Dios ñinmiñyii ajcxy.

¹³Miid je Huindzin Jesucristo ycixpi, capxymidoogixy tüg'óciy gobierno tungmiidpi etz cajp tungmiidpi y'ane'min ycötujcin, nañ capxymidoogixy jadu'n nej je mij'ane'mbi y'ane'my. ¹⁴Nañ capxymidoogix tungmiidpi ajcxy huidibi je mij'ane'mbi yquejxyp jigix tzaachytunipy je' ajcxy huidibi tundigooyb etz capxpaadipy je' ajcxy huidi oyhuinma'ñ ytumy.

¹⁵Dios chojcyp co tiydudägy mdzináaygixipy, jigix jëbi je jäy ajcxy huidibi ca' huinjihuiygixy Dios ytiy'ajt, huidibi tzuu huinma'ñ miid, ca' ajcxy mihuinma'ñybaady nej jibic xyñigapxip.

¹⁶Tzinaaygix jadu'n nej jäy chinäy huidibi cuydumb Dios ytiy'ajt, huidibi ti ixmach yi ayuc tiy'ajt huidibi ca' ytiyity. Pen mmidundigooyb ajcxy tunmiidpi y'ane'min ycötujcin, ca' huaad mnaybidáacigixy jadu'n nej jihuüy Dios xylugarmooygixy jigix jëbi mdundigooygixy. Copicy mdzinähuipy ajcxy jadu'n nej Dios ytumbi huidibi oy tumb. ¹⁷Migüg'adii ajcxy tüg'óciy jäy. Naychójcigix nayjihuiygix nidüg nidüg huidijaty yajmij'ajtp Dios. Yajmij'ajtcix Dios. Capxymidoogix yi mij'ane'mbi.

Jadu'n nej Cristo tzaachypi yajnajx

¹⁸Tumbidijc ajcxy, iimidoogix capxymidoogix mhuindzindijc. Pen oyjäy yi mhuindzin huidibi yung

naxy yjot yhuinma'ñ miidity, o pen ahua'njäy jibicjäy, ca' yñejity, capxymidoogix. ¹⁹Yjäygidägipy Dios pen mmecxtujctaaygixyp nej jäy ajcxy ychaachytungixy miid co oyhuinma'ñ miich ajcxy mmiidity. ²⁰Pen ti anajty mdundigooygixy, e paady anajty myajtzaachytungixy, ca' pin xycömáaygixipy xycapxpáadygixipy, oy ti mjamecxtujctaaygixy huidijaty tzaachypi. Pen ooy mdungixy etz tzaachypi mbaatcixy, chi janchtiy Dios jäygidägipy nej mmimecxtujctaaygixy. ²¹Dios chojcyp co mmecxtujctáaygixipy je tzaachypi huidibi mminajxyp myajnajxcixyp miid co oybi mdungixy. Paady ycixpi je Cristo tzaachypi ayo'n minajxy yajnajxy miid iich ajt ycixpi, e yejc iixpejt jadu'n nej jëbi huaad mminajxcixy myajnajxcixy tzaachypi ayo'n, nañ nej jëbi huaad mbanicxcixy mbayöygixy yi' y'ijxpejt. ²²Je Cristo ca' je' ma ytundigooy, e nañ ca' pin huin'iiñ. ²³⁻²⁴Je Cristo co jäy ajcxy y'oji, ca' je' y'adzouhuimbijty; e co jäy ajcxy chaachytuuni, ca' mijotmäthuimbijty je jäy ajcxy, nīgi Dios yajpuhuaniiy. Com Dios je' paatip nej chaachytuna'ñ huidi ajcxy tundigooyb. Je Cristo ci'm yajnicx iich ajt ndzaachypi co y'o'cy cruudzcíxy. E miid co jadu'n y'o'cy cruudzcíxy miid ajt nbocy ycixpi, chi jëbi n'ixmajtzim jibic-huinma'ñ etz tudägy jëbi ndzinaayim. Miid co Cristo je tzaachypi minajxy yajnajxy miid iich ajt nbocy ycixpi, paady nidzoocim ajt n'alma. ²⁵Miich ajcxy jecy'ajt mniidigooyb mdüdigoooyb anajty ajcxy ma

Dios, mgi'mhuinma'n anajty
ajcxy myajtumyb nidüg nidüg,
jadu'n nej jäy yborregi ñidigoy
ytüdigoy ma yuugjot. Cham
miich ajcxy ti mnijothuimbijtcixy
Dios, ti ajcxy mhuinma'ñymech
ti mmijpidaaccixy Jesucristo je
huidibi xycuend'ajtp ajcxy.

**Nej huaad chinaaygixy
pinjaty ti pijcixy**

3 ¹⁻² Jadu'n nej tumbidijc
capxymidoy yhuindzin, nañ
tim jadu'n miich ajcxy töxyjäydijc
capxymidoogixy mñäy. Pen
mñäy ca' capxymidoy Dios, ca'
mijpidäga'n Jesucristo, miid co
miich oyjot oyhuinma'n myajtunipy
miid yi', ycadimjetyity huin'it mñäy
yhuinma'ñymedzip etz mijpidägipy
Jesucristo, co y'ixipy nej miich
mmiidity tudägy'ajtin. ³ Töxyjäydijc
ajcxy, ca' mnaygömayiib miid
mhuit mxojx oyjatpyi tzoujatypi,
miid oori cijiitz etz oori taatztiy,
miid co mgöhuay mdzachcüdigy
miid cüd oyjatyp. ⁴ Hue' janchtiy
jäy miich ajcxy xycömayip miid
co oyjot oyhuinma'n anajty
myajtungixy, miid co yung naxy
mjot mhuinma'n ajcxy miidity.
Co jadu'n mdüngixipy jada je' oy
jäygidaacni ma Dios huinixii. Yi
mhuit yi mxojx etz oori taatztiy
cixip tigoyip yi'. ⁵ Nañ tim jadu'n
anajty jecy'ajty je töxyjäydijc
huidibi anajty ajcxy cömay
ijtp, yajtuuñ anajty ajcxy oyjot
oyhuinma'n, ymijpidacyp anajty
ajcxy Dios, nañ ycapxymidooyb
anajty ajcxy ñäy. ⁶ Jadu'n nej
Sara capxymidooy Abraham.
Sara xiigoyäxy Abraham: "ñich

nhuindzin." Pen myajtumyb miich
ajcxy oyjot oyhuinma'n jadu'n nej
Sara, jadu'n miich ajcxy anajty nej
jihuüy Sara ajcxy xy'ung'adyii, pen
ooybi mdunipy ajcxy, ca' ti ajcxy
mdzigihiuipy.

⁷ Nañ jadu'n miich ajcxy
yëydijctijc, yajtungix pa'ayo'n miid
mdöxyijc, yajmij'ajtcix. Com jac mic
miich ajcxy ca'ydi yi töxyjäydijc.
Dios may'ajt ti tuñ tú'ciy miid
miich ajcxy, paady ycixpi copicy
yajxon naymiiddzináayigix jigix
Dios cuendipigipy etz xymöhuipy
tijaty ajcxy myajmibijctzooyb.

**Co pinjaty xymidundigooy,
ca' myaj'ahuimbidity**

⁸ Jada ayuc cham
njacyajnimaydaayb nidüg'óciy
miich ajcxy. Tú'ciy mjot mhuinma'n
mi'ijtcix, naymigüg'ájtigix yajxon,
naychójcigix nayjihuüiyigix
nidüg nidüg, nayba'ayouhuigix
nidüg nidüg, pidaaccix yung
naxy mjot mhuinma'n. ⁹ Co
ajcxy migüg xymidundigoyipy,
ca' myaj'ahuimbidity jadu'n nej
anajty ti xytuñ. Co ajcxy migüg
xyñi'ojihuipy, ca' myaj'ahuimbidity
jadu'n nej anajty ti xyñi'ojiy. Nigi
nibijctzohui' ma Dios miid yi' ajcxy
ycixpi, nigi mi'oyjäy'at mmigüg.
Huin'it nigi Dios xyconuucxip.
¹⁰ Com jiiby ymiñ jaybety ma Dios
ñecy:

Pinjaty jotcuyc tzinähuamb e
yajnaxa'n xii tiempo agujc
jotcuyc, nay'ahuijtzigiib ca'ydi
y'iidigooy ycapxtigooy, ca'ydi
y'aniidägy.

¹¹ Huen jihuägy ma je jibicpi e
huen oyjäy'ajtin tuñ. Huen

ixmach tüg'óciy tzipcapxy, ca' tzipcapxy ixtáhuipy.

¹² Je Huindzin Dios ycuend'ajtpy yi' je jäy huidibi tiydudägy tzinaayb etz ypubejtcixyp ypudigiygixyp migügtijc co tijaty mibijctzoy. Dios ymijotma'tpy je jäy ajcxy huidibi jibic-huinma'n tumb.

¹³ Pen mdumyb oyjot oyhuinma'n ajcxy, huin'it ca' pin ajcxy xymijotmädiyp. ¹⁴ Co oyjot oyhuinma'n myajtunipy ajcxy e huin'it jäy xychaachtungixy, huin'it Dios xyconuucxip ajcxy, e ca' mdzigäygixipy, ni ca' mhuinma'nydigóoygixipy.

¹⁵ Mijpidaaccix yi Jesucristo iich ajt nHuindzin Dios cixyot huinijot. Pen ji jäy xy'amidoogixy: ¿Ti co mdzachmijpidaaccixy Jesucristo? Tiydudägy m'adzouhuipy miid yung'ajt nax'ajt jadu'n nej mjijp'ijxcixy co Jesucristo xyajnidzögaani ajcxy yi m'alma.

¹⁶ Ca' mgapxipy ajcxy je ayuc huidibi xyajtzo'yduunip. Pen jäy ajcxy xymi'iidigooygixp xymigapxtigooygixp, chi ajcxy jihuühuamby tzo'ydu'n miid co ca' yjanchity nej ajcxy ymina'n com oybi anajty ti mdungixy. ¹⁷ Pen Dios miich ajcxy jadu'n xyajnijot'ajt co tzaachypi mminájxcixipy myajnáxcixipy, jac'oy co tzaachypi mminájxcixipy myajnáxcixipy miid yi m'oyjäy'ajtin ycixpi, e ca' anajty tzaachypi mminajxcixy myajnajxcixy miid co anajty ti mdundigooygixy.

¹⁸ Je Cristo nañ jadu'n tzaachypi minajxy yajnaxxy co y'o'cy cruudzcixy miid jäy ajcxy ypocy

ycixpi. Oy je' anajty ca' tibocy miidity, chi je' ti codinäy je jäy ajcxy ypocy, e jadu'n iich ajt ti naymi'oyiiyim miidi Dios. Oy je Cristo ñinïcx y'o'cy, per je' y'alma ca' je' y'o'cy, jugypijcy je' jadügtecy miid jemybi ninïcx. ¹⁹ Huin'it co Cristo y'o'cy, chi je' y'alma ñicxy, e capxhuäcxy yi' y'ayuc ma jäy y'alma ajcxy huidibi jibictuuyb ijtp. ²⁰ Je jäy ajcxy je' jibby y'alma ijtp jibictuuby huidibi anajty ca' capxymidoy Dios. Je taab Noé yajcojy je mij barco, ooy Dios ajcxy jecy ymimecxtujci, huen tijy cayjothuimbijty ajcxy. Jëyi niductujc je jäy choocy ma je mijtuu je mijniigom. Je' co je jacjadyi ca' ajcxy yjothuimbijty.

²¹ Jadu'n nej je niductujcpi ajcxy mijpidacy Dios y'ayuc, e chi ajcxy choocy, nañ tim jadu'n iich ajt co nniibejtim je' iich ajt ndiy'ajt'ajtim co nmijpidaacim Jesucristo je huidibi co y'o'cy jugypijc miid jemybi ninïcx, etz ti xyajhuaatzim njot nhuinma'n jigix ooy oy nayjihuiiyim, etz nañ jadügtecy co anajty n'o'cim xyajjugypijcim miid jemybi ninïcx. Co nniibejtim, je' je' je tiy'ajt co Dios ti xyajhuaatzim njot nhuinma'n. ²² Je Cristo ti je' ñicxy tzajpjoty. Jiiby je' cham y'ity mij'ane'mbi ma Dios, yi' je' ane'mb je ángeles ajcxy huidi tzajpjoty tungmiid etz huidijaty mic'ajt miid tzajpjoty.

**Yajtungix je mic'ajt huidibi
Dios ti xymooygixy**

4 Je Cristo ayo'n tzaachypi minajx yajnax co yhuidijty ya naaxhuiñybi, e chi yajtuuñ oyjot

oyhuinma'n miid jäy ajcxy ycixpi. Paady ycixpi copicy miich ajcxy myajtunipy oyjot oyhuinma'n miid migügtijc jadu'n nej Cristo yajtuuñ. Pen miich ajcxy mminajxyp myajnajxyp tzaachypi miid co oyjot oyhuinma'n myajtuuñ, chi ca' mjacnijot'ajtip ajcxy jibic-huinma'n. ²Jadu'n nej ajcxy mjactzinähua'n mjacjugy'ada'n, ca' huaad mjacnijot'ajtcixy je jibic-huinma'n. Hue' janchtiy mdunipy ajcxy jadu'n nej Dios tzocy. ³Jecy'ajty co anajty ca'ni mnejhuiygixy Jesucristo ytiy'ajt, jibic-huinma'n anajty ajcxy myajtumyb ma mdzinaayin mjogy'ajtin, jadu'n nej jäy ajcxy jacjadyi huidibi ca'ni nejhuiygixy Dios ytiy'ajt. Chi anajty myajtungixy canaagnax je jibic-huinma'n, ooy ajcxy mnijot'ajtcixy maynax jibic-huinma'n. Ooy anajty anaxy mdzach'üccixy vino, huin'it anajty ooy ajcxy ymügyi. Ooy anajty mnixondaaccixy coodz huididi, huin'it anajty ooy m'uuccixy anaxy. Ooy mnijot'ajtcixy xii, ooy anajty m'ojadajtcixy tzaadzech quipychech huidibi Dios ca' jäygidägy. ⁴Paady ycixpi je jäy ajcxy huidibi ca' nejhuiygixy Dios ytiy'ajt, ca' ajcxy jäygidägy co ca' miich ajcxy cham jadu'n m'idich jadu'n nej yi' ajcxy y'idich, chi ajcxy jibic xyñigapxcixy xyñi'ojiygixy. ⁵Ca' mdungixy cuendi yi' ajcxy, com Dios paatip nej ytiyduna'n ajcxy. Je Dios je' tiydunamb nidüg'óciy jäy ajcxy huidibi cham jugy'ajtp, etz tiibi y'öccixy. ⁶Paady ycixpi ti yajnimäy Jesucristo ytiy'ajt je jäy tiibi y'öccixy jigix yajtiydunipy

ajcxy miid Dios ytiy'ajt jadu'n nej yajtiyduna'n yi' ajcxy huidibi jacjugy'ajtp cham. Jëbi huaad ajcxy yjugypijccixy jadügtecy etz y'idipy ajcxy jadu'n nej Dios y'ity.

⁷Ti ytimyhuingoni je xii je tiempo mina ycixaani ytigoyaani tüg'óciy tijaty ya naaxhuiñybi. Paady ycixp tzocy co tiydudägy etz huijycujc mdzinaygixipy, etz tzocy co mjac'ojadadipy mjacmibijctzoohuipy ajcxy Dios. ⁸Ooy ycopicyity co jacnaychójcigix jacnayjihuiygix nidüg nidüg. Miid co mnaychójcigixy, paady ycixpi jëbi mnayméecxigixy. ⁹Naymi'oyjäy'ajtigix nidüg nidüg aguyc jotcujc, ca' y'ametz yjotmetzity. ¹⁰Yajtungix miid je migügtijc jadu'n nej Dios xymooygixy ixpijcin nidüg nidüg. Naybubéjtigix naybudigíiyigix miñ xyipy jadu'n nej jäy ajcxy huidibi yajxon Dios ytiy'ajt padungixp. ¹¹Pen Dios ti xymooygixy ixpijcin jigix jëbi capxhuäcxy yi' y'ayuc, yajxon Dios y'ayuc mgapxhuäcxip. Pen miich xypaat pujigii jëdzigii, yajxon mdunipy ajcxy jadu'n nej Dios huinma'n ti xymooygixy. Co yajxon Dios ytiy'ajt mguyduunipy, huin'it Dios cömaya'n miich ajcxy, miid co ti mmijpidaaccixy Jesucristo. Je Jesucristo je' cömay'idip etz ane'mip huinixii huinientiempo.

Mimeextujccixy tzaachypi ayo'n

¹²Migügtijc ajcxy huidibi ooy ndzocy njihuiyich, ca' ooy mhuinmay'ahuidijtcixy co jäy xy'ixhuidijtcixy xypahuidijtcixy, co jäy xychaachytunaangixy

jigix jēbi ñiguëxīgipy pen janch mmibijccixy Jesucristo. ¹³Ca' ajcxy mdajipy mmayipy, jotcuyc ajcxy mnayjihuihuiyb jigix jēbi nañ jadu'n tzaachypi mminajxcixy myajnajxcixy nej Cristo minajxy yajnajxy tzaachypi. Co anajty jadügtecy Jesucristo ñayguëxīgii ya naaxhuiñ miid ymic'ajt y'oy'ajt, jēbi ajcxy jotcuyc mnayjihuihuiib.

¹⁴Pen xymi'iidigooyb xymigapxtigooyb jäy ajcxy, miid co miich ajcxy ti mmijpidaaccixy Jesucristo, jotcuyc mnayjihuihuipy, miid co miich ajcxy miid je Dios yjihuiñ etz Dios ymic'ajt ma mjot mhuinma'ñ. ¹⁵Pen nidüg miich ajcxy ayo'n tzaachypi mbaatcixy, oy ca' anajty ti mjäyyaj'öccixy, oy anajty ca' ti mmeetzcixy, oy anajty ca' ti mdundigooygixy, oy anajty ca' ti mnaybidáacigixy ma huingjäy ti ytundigooy, ¹⁶pen miich ajcxy tzaachypi mminajxyp myajnajxp miid co ti mmijpidaaccixy Jesucristo, ca' ti tzo'ydu'n mjihuihuipy, ñigi Jesucristo cōmay'idipy.

¹⁷Ti xii tiempo tim paatni mina Dios tiyduna'ñ je jäy ajcxy huidibi cuydumb je' ytiy'ajt. Pen Dios iich ajt huidi nmibijcim xytiyduunim e nbaatim hueeni tzaachypi, ñigi tzaachypi padaangixy ajcxy huidibi ca' mijpidaaccixy Dios. ¹⁸Pen je jäy huidibi oyjot oyhuinma'ñ miid mic tzaach padaangixy je' y'alma nïdzocin, éti jada ytunaangixy pinjaty jibic-huinma'ñ miid, pinjaty pocytungix? ¹⁹Pen tzaachypi mminajxyp myajnajxyp ajcxy miid co Dios jadu'n chojcyp, ca' ajcxy mjotmetzcíhuipy, ñigi ajcxy

panicxcix payöygix oyhuinma'ñ, ñigi cixyot huinijot mijpidägipy ajcxy Dios; com yi' miich ajcxy xyajcoj, e yi' xycuend'ajtcixp; com Dios yi' je' tudägy etz nïdinaayb je' y'ayuc.

Pedro capxhuijp je mibijpidijc

5 Jada iich miich ajcxy yajnimaayb huidibi nigohuajc'ajtp je mibijcpidijc, iich nañ jadu'n nigohuajc'ajtpyich mibijcpidijc. Iich n'ijxyich co je Cristo ayo'n tzaachypi minajxy yajnajxy. Nañ jadu'n iich yi' nmïid'idaamybich jadüg'oc co anajty ymiñ ya naaxhuiñ miid y'oy'ajtin ymij'ajtin. ²Jada iich miich ajcxy nyajnimaayb: yaj'ixpijccix etz cuend'ajtcix Dios yjäy agujc jotcuyc. Ca' myaj'ixpigipy ajcxy ametz jotmetz, cuend'ajtcix Dios yjäy, tim jadu'n nej jäy ycöbixy cuend'aty. Ca' meeñgíxy myaj'ixpigipy ajcxy. Miid oyjot oyhuinma'ñ myaj'ixpijccixy. ³Ca' adzip ahua'n m'ane'mipy Dios yjäy. Hue' janchtiy iixpejt oybi yejccix. Cuydungix Dios ytiy'ajt. ⁴Co anajty Jesucristo, je huidibi nihuindzin'ajttaayb tüg'óciy, ñayguëxīgii ya naaxhuiñ jadüg'oc, chi cōmay miich ajcxy mbïdzimipy. Tim jadu'n nej jäy ajcxy co y'iyiigixy e co ymadaaccixy, chi cōmay ypïdzim ajcxy. Miich ajcxy cōmay nañ jadu'n m'idipy huinixii.

⁵Myajmij'adipy anäctijc ajcxy, je' ajcxy huidibi nigohuajc'ajtp je mibijcpidijc. Ooy ycopicyity co nidüg'óciy miich ajcxy mnayyajmij'ajtigixipy miñ xyipy miid oyjot oyhuinma'ñ. “Dios ca'

je' jäygidägy pinjaty amij agix jäy'ájtigixy. Dios ypubejtyp miid y'oyjot pinjaty yung naxy yjot yhuinma'n miid." ⁶Mgapxcöbigipy ajcxy tiydudägy Dios, je mij'ane'mbi, chi Dios xycömayipy mina anajty. ⁷Mibijetzougix Dios miid tüg'óciy tijaty jotmay ajcxy miid'ajtyp, chi jēbi Dios xypubedipy xypudigihuiipy ajcxy.

⁸Huijycujc m'idipy ajcxy. Nixi' m'idipy ajcxy. Com je mujcu' huidibi xymiidzip'ajtim, ooy je' xy'ix'ijxim xypa'ijxim. Hue' xyajhuinma'nydigoyaanim, tim jadu'n nej je caa co ixtay ti chüdzaamyb. ⁹Huindina' jįptina' ajcxy je mujcu'. Yi jacjadyi jäy huidibi mijpidaaccixy Jesucristo, nañ yminajxcixyp yajnajxcixyp tzaachypi nañ jadu'n. ¹⁰Co anajty ajcxy hueeni tzaachypi ti m'ocyajnaxy, huin'it Dios xyaj'oyiipy ajcxy yi mjot yi mhuinma'n, xyajmibigip ajcxy yi' ytiy'ajt, xyajjotmicpigip ajcxy. Com Dios yi' je' huidibi may'ajt ti tuñ mijcajee miid nidüg'óciy jäy ajcxy. Yi' je' huidibi ti yaj'oyiy nej jēbi cömay huinixi n'ijtim miid Jesucristo jilby tzajpjoty. ¹¹Huen

Dios y'oy'ajtin etz ymij'ajtin idipy huinixi.

Capxpoocxin yajnajxp

¹²Jada necy nyajniguejxy ajcxy miid Silvano iich ajt nmigüg huidibi ndijpyich co ooy yajmij'aty Jesucristo. Hueeni jada ayuc huidibi nyajnijayiyb, nañ ti nbidägyich necyjoty capxhuijin etz ti nbidägyich necyjoty yi Dios ytiy'ajt tudägy, nej Dios may'ajt oy'ajt tuuñ miid miich ajcxy ycixpi. Mijpidaaccix nigi Dios ytiy'ajt, ca'ydi mhuinma'nydigooygixy.

¹³Je jäy huidibi ya Babilonia huidibi ajcxy yajmij 'ajtcixp Jesucristo, je jäy ajcxy huidibi Dios ti huin'ixy, xyajniguejxp ajcxy capxpoocxin. Nañ jadu'n Marcos iich nmigüg, je huidibi njihuiybich nej jihuüy ngi'm'ung'adyiijich xyajniguejxp capxpoocxin nañ jadu'n.

¹⁴Naygapxpóocxigix xic xon nidüg nidüg miñ xyipy. Je' je' je tiy'ajt co mnaychójcigixy mnayjihuiyigixy miñ xyipy.

Jotcujc mnayjihuihuiyb ajcxy nidüg'óciy huidib yajmij'ajtp Jesucristo. Amén.